

# LI BOURGADIÈIRO

## I QUE ME LEGIRAN

Oi, i'a 'n pau de tout dins aqueste libre,  
Ai ris e ploura tout en l'escrivènt,  
Sièi un paure enfant, rude, franc e libre,  
Que parlo e que dis tout coume ié vèn...

La man dóu Bon Diéu a tra sus ma vido  
De souspir, de plour e de cacalas,  
Es d'acò d'aqui que soun espelido  
Mi pàuri cansoun, mi flou de bartas.

Enfant dóu travail, s'envan pèr carrièiro,  
Descausso, bras nus, sèns fard, sèns façoun,  
De que vous dirai? Soun de bourgadièiro:  
Un pau batarèl, mai ounèste au founs!